



COMMUNICAZIUN A LAS MEDIAS

Cuira, ils 30 da zercladur 2020

Nagina discriminaziun da pèrs maridads en il chantun Grischun – favurisaziun anticonstituziunala da persunas ch'educheschan sulettas en il dretg fiscal chantunal

Grazia al splitting parzial na datti en il Grischun nagina discriminaziun da pèrs maridads tar la taglia chantunala e communal. Percunter violescha la distgargia fiscala smesirada per persunas ch'educheschan sulettas il princip costituziunal che prevesa l'imposiziun da taglia tenor la productivitat economica.

Discriminaziun da pèrs maridads

La Dretgira administrativa dal chantun Grischun è s'occupada dacurt cun in cas presuntiv d'ina discriminaziun da pèrs maridads. Ins discorra da discriminaziun da pèrs maridads, sche pèrs maridads èn dischavantiads dal punct da vista fiscal en cumparegliaziun cun pèrs en concubinad. Il Tribunal federal ha fixà gia il 1984 (DTF 110 la 7) che las legislaziuns fiscalas chantunalas na dastgan betg engrevgiar pèrs maridads pli fitg che pèrs en concubinad. Pli tard ha il Tribunal federal precisà ch'ins discorra d'ina discriminaziun pir a partir d'ina differenza da la grevezza fiscal da 10 %. Decisiva è la cumparegliaziun d'in pèr maridà senza uffants cun in pèr en concubinad senza uffants.

Splitting parzial per evitar ina discriminaziun da pèrs maridads

En il chantun Grischun garantescha il legislatur cun l'uschenumnà splitting parzial (las entradas dals conjugals vegnan divididas cun il factur 1.9) ch'ils conjugals na subeschan betg ina chargia fiscal supplementara – che vala sco discriminanta – en cumparegliaziun cun in pèr en concubinad. En il cas concret examinà importava la chargia fiscal supplementara tar la taglia chantunala 1.42 %, quai ch'è lunsch sut la limita determinada dal Tribunal federal da 10 %.

Discriminaziun da pèrs maridads tar la taglia federala directa

En il sector da la taglia federala directa ha la chargia fiscal supplementara sin fundament da la maridaglia muntà en il cas preschent a 91.3 %. I sa tracta damai d'ina discriminaziun da pèrs maridads. Questa imposiziun da taglia sa basa però sin la Lescha federala davart la taglia federala directa che tant la Dretgira administrativa sco er il Tribunal federal ston applitgar, schizunt en cas che cuntrafan a la costituziun (art. 190 Constituziun federala). La Dretgira administrativa ha damai pudì constatar sulettain l'anticonstituziunalitad, ha però stuì refusar il recurs dals conjugals en quest punct.

Distgargia fiscal smesirada per persunas ch'educheschan sulettas

Il dretg fiscal chantunal prevesa d'applitgar il splitting parzial era per persunas ch'educheschan sulettas (famiglia monogenitoriala). Quai ha per consequenza ch'ina persuna che viva suletta cun uffant vegn taxada quai che riguarda las taglias chantunalas e communalas precis tuttina sco in pèr maridà cun uffant cun las medemas entradas. La productivitat economica d'ina persuna ch'educhescha suletta è pli gronda che quella d'in pèr cun uffant cun las medemas entradas. En l'emprim cas ston vegnir cuverts cun las medemas entradas ils custs da viver d'ina persuna creschida e d'in uffant, en il segund quels da dus creschids e d'in uffant.

Reglamentaziun chantunala anticonstituziunala

Questa reglamentaziun chantunala è stada prescritta oriundamain uschia dal legislatur federal, avant ch'il Tribunal federal l'ha sbittà sco anticonstituziunala. Era sch'ins ha modifitgà en consequenza il dretg federal per il 1. da schaner 2011, ha il legislatur chantunal tralascià fin ussa d'adattar la lescha chantunala fiscala en quest punct.

En general pon ins dir ch'ina persuna suletta cun uffant ha dapli expensas ch'ina persuna suletta senza uffant, però expensas pli bassas ch'in pèr maridà cun uffant. Sch'il legislatur chantunal vul adattar la reglamentaziun anticonstituziunala da fin ussa, vegn el a stuair tegnair quint da quest fatg.

Sentenzia A 19 13 dals 31 da mars 2020

Persuna da contact:

lic. iur. Giuliano Racioppi, Dretgira administrativa dal chantun Grischun, Obere Plessurstrasse 1, 7000 Cuir, tel.: 081 257 39 83, e-mail: giuliano.racioppi@vg.gr.ch

Collegio/Funtauna: Dretgira administrativa dal chantun Grischun